

Tischler

I.

Assez plus que d'estre amez
me sui penez d'avoir chier;
toz m'i sui entrobliez,
tant sui en autrui dangier.
Por vos m'estuet tot leissier,
dame, a cui sui toz donez:
cuer, pensee, et volentez
ai mis en vostre prison.
Souviegne vos de moi, bele;
ja ne pens je s'a vos non.

II.

Dame, par moi sui grevez,
quant je en vos ma mort quier
en regardant vos beautez,
dont naissent mi desirrier,
c'ainc ne vint mes eus proier
vos gens cors d'estre esgardez.
Mes estre en doit pluz blasmez
vos cuers que ne di, ce croi;
quant pluz sa merci desir,
pluz est crüeus envers moi.

III.

Li grés, dame, est entamez
par l'iaue sovent touchier;
mes je ne voi vo cruautez
de mes lermes enforcier
et vostre amor eslongier
fait de moi humilitez,
s'en sui si desesperez
ke je n'atent fors la mort.
D'amor trop lotainne
n'atent nul confort.

IV.

Cil qui sevent a toz les
novele amor acointier
ne sentent pas teus grietez
com je par mon desirrier;
ainc ne m'osa aprochier

trahisons ne faussetez,
mais douçors et loiautez
si poissanz ke je bien sai,
quant ces amors me faudront
ke j'ai, ja mais n'amerai.

V.

De ma dame sui doutez,
mes, certes, n'eüst mestier;
ne sui pas a li remez
por son pris desavancier;
dons qui puisse honor blecier
n'iert ja par moi demandez.
S'amor m'otroit, c'est asses
po guarir ami loial;
s'ele me deignoit amer,
ja je n'averioie mal.

- letto 484 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/tischler-0>